

Der Neid

Scho am Vormittag hockt er vorm *Frühstücks-TV*
sauft im Wohnzimmersofa sei Bier
Jogginghos'n und Feinripphemd über seim Bauch
raucht Ziagrett'n und lebt vo *Hartz IV*

Und er denkt: „Ja, so schlecht geht's nur mir
Und i ko überhaupts nix dafia“

Und dann schaut er im Fernseh'n des Promi-Programm
siagt den *Lifestyle* vo andere Leit
wia's *Champagner* nur saufa und *Jaguar* fahr'n
und es packt eahm der grundlose Neid

Weil er moant, er bringt's niamois so weit
Und er duad si nur selba no leid

**Der Neid macht si breit – frisst's Viech und die Leit
frisst dei Herz und dei Hirn – lasst di alles verlier'n
Der Neid macht di dumm – der Neid bringt di um**

**nimmt dir d'Freind, nimmt dir d'Freid – der Neid
nimmt dir d'Freind, nimmt dir d'Freid – der Neid**

Sie is g'sund, sie hat Geld und sie woaß, ihr geht's guad
liabt ihr Tochter, ihr'n Buam und ihr'n Mo
Doch den Nachbarn geht's besser und sie kriagt a Wuad
weil sie's ned ganz genauso ham ko

Und sie schaut ihre Nachbarn nur o
und sie is mit ihr'm Leb'n nimmer froh

Nach der Schui kommt der Bua ganz bedepert nach Haus
und verzählt, was die andern ois ham:
Marken-G'wand und vo allem des neieste Zeig
i-Phones, Notebooks, des ganze Programm

Und die Ferien sans in *Mexico*
und mia wieder nur in *Jesolo*

Refrain

Hat moi oana aus eigener Kraft selba was gschafft
hat er's irgndwia zu irgendwas bracht
Is am besten, er kauft si nix Neis und bleibt schdaad
weil er sonst nur die Leit verruckt macht

Und wenn sei Existenz z'sammakracht
sans erst z'fried'n und dann wird no glacht

Schlagt di oana am S-Bahnhof krankenhausreif
ko's leicht sei, dass des gar koana schoit
Doch kaufst du dir an *Porsche*, stehn's alle glei da
und woin wissn: „Was hast für den zoit?“

„Hast den nei kauft oder is der scho oid?“
Und er brennt wieder auf - dieser Neid

Refrain

Text und Musik
Michael Bohlmann
02 / 2010